

վճռեց գնալ Սպահան եւ այնտեղի Հայերի օգնութեամբ ամուր պարտքից ազատելու եւ նորից կաթուղիկոսանալու հնարքը գտնել: 1603 թուին նա մտաւ Սպահան, որտեղ Շահաբբասը մեծ պատուով ընդունեց: Մեկքիսէթ եւ Դաւիթ կաթուղիկոսները գիտէին, որ Շահաբբասը՝ Սպահան գաղթած քրիստոնեաների խորհրդով կամենում է գալ նուաճել Հայաստանն եւ ազատել Օսմանցւոց ձեռքից, ուստի մտածեցին օգնել Շահաբբասի այդ դիտաւորութիւնն իրագործելու: Նրանք կարծում էին, որ մաքրելով երկիրն Օսմանցիներից, իրենք եւս կ'ազատուին պարտքից եւ դարձեալ կը վարեն կաթուղիկոսութիւնը: Առաքել պատմագիրն անէծք է թափում կաթուղիկոսների վրայ այդ երկնած խորհրդի մասին. «Խորհեցան, ասէ, խորհուրդ եւ ոչ Տերամբ, ըստ գրեցելումն, ի կորուստ անձանց իւրեանց. կործանումն եւ ի տապալումն աշխարհին եւ ի ջնջումն ազգին իւրեանց»: Ի հարկէ, անարդարութիւն է՝ այդ կաթուղիկոսներին համարել միակ պատճառն ապագայ աղէտների, այլ այս ստոյգ է, որ Մեկքիսէթ կաթուղիկոսի Սպահան գնալն եւ Շահաբբասին յորդորելը գալ ազատել երկիրն Օսմանցւոց ձեռքից, արագացրեց գործի լուծումը: Շահաբբաս շարունակ մտածում էր քանդել Օսմանցւոց հետ արած իր հաշտութիւնն եւ Ատրպատական ու Արարատեան աշխարհն ազատել նրանց ձեռքից: Այդ դիտաւորութիւնն իրագործելու համար նա յաջող առթի էր սպասում. նրան հարկաւոր էր հաւ-